

Protocol no. 13
Sezzüda da marcurdi, 5 avrigl 2012 – 8.45 – 11.45

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)

Protocol

Il protocol no. 12 da la sezzüda da mardi, 27 marz 2012 vain approvà.

77 021 FABRICA
Jon Carl Rauch- Müdamaint vi dal proget dal sistem fotovoltaic –
Cursch

Causa cha'l sistem fotovoltaic tenor il proget uriunt nu funcziuna a satisfacziun ha il patrun da fabrica inoltrà ün müdamaint dal proget. Il Cussagl cumünal decida da conceder il permiss pel müdmaint dal proget tenor ils plans inoltrats e fats bun tenor la procedura per stabilimaints dadour la zona da fabrica (BAB).

La taxa da trattamaint importa fr. 50.00

78 720.434.02 Deponia La Fuorcha
Deposit da material giò la deponia da la Fuorcha

Tenor il permiss concess da l'uffizi per natüra ed ambiaint esa admiss da deponar be material inert (net, genuin) giò la deponia da la Fuorcha. Aldüm nu vala sco material inert.

Ultimamaing esa gnü deponà ün quantum plü grond d'aldüm sül plazzal cumünal sur la deponia da la Fuorcha ingiò chi vain s-chargiada e chargiada la laina.

Quist plazzal nu tocca vairamaing pro la deponia svessa, ma i's tratta d'ün deposit d'aldüm sün terrain cumünal. Tenor l'uorden champester art. 33 pon gnir fats aldümers sün terrain cumünal be cun permiss in scrit dal Cussagl cumünal. Causa cha'l Cussagl cumünal nun ha concess il permiss toccant, decida'l da comunichar al paur pertoc cha l'aldüm haja da gnir allontanà fin ün termin fixà e cha l'aldüm chi nu saja allontanà davò quel termin vegna rumi dals lavuraints cumünals in mettend in quint la lavur ed ils cuosts da deponia per deposits specials al chaschunader.

79 801 MELDRAMAIN DA PASCULAZIUN E FUOND
Cunvegna tanter il cumün e las OEE a regard la sauaziun

Tanter il cumün e las OEE faja dabsögn da stipular üna cunvegna chi regla ils detagls a regard l'installaziun ed il mantegnimaint d'ün filter illa centrala da Pradella. Quist filter es necessari per proteger ils ventils da l'indriz da sauaziun. Sül sböz da la cunvegna d'eira previsa la firma da l'anterieur president da la cumischiun da sauaziun. Causa cha'l proget da la sauaziun es i via davo la collaudaziun, sco tuot ils progets da l'ameglioraziun generala, in possess dal cumünl, es il Cussagl cumünal da l'avis chi fetscha sen da laschar firmar la cunvegna dal capo insembel cun l'actura.

80 151.660.01 Sanaziun dal tir Parnarsura
Cumplettaziun chaistas chi tschüffan sü ils tuns

In connex culla sanaziun da l'implant da tir a schaubgia a Parnarsura vain fat amo üna cumplettaziun da las chaistas chi tschüffan sü ils tuns. Per finir giò il proget ed in vista cha pro la renovaziun nun es gnü dovrà tuot il credit concess decida il Cussagl cumünal da dar liber fr. 2'700.—per la cumplettaziun da las chaistas.

81 79 PLANISAZIUN DAL TERRITORI
Prioritats a regard il repassamaint da la revisiun totala da la planisaziun cumünala.

In connex culla revisiun totala da la planisaziun cumünala inviada la fin da l'on per la preexaminaziun tras las istanzas chantunalas e revochada ultimamaing per tilla pudair amo üna jada repassar, decida il Cussagl cumünal d'as concentrar pro'l repassamaint süllas seguaintas prioritats:

- a. Zona da fabrica per indigens
- b. Zona da fabrica Prà Vidal
- c. Finischiun da la pista dal sömme
- d. Singuls temas punctuals per optimar la revisiun totala da la planisaziun

In connex culla planisaziun cumünala esa ultra da las prioritats survart previs cha'l planisader Orlando Menghini elavurescha pel plan da fuormaziun la varianta chi amegldress las premissas per la zona da mansteranza da Pozzet sco discuss fingià dal Cussagl cumünal.

82 ORIENTAZIUNS

“Grotta da cultura”

Il nouv possessur da l'hotel Rezia es intenziunà da douvrrar svesch las localitats cha la “Grotta da cultura” vaiva a fit fin uossa. Our da quel motiv tschercha la società daspö ün ter temp fingià novas localitats per pudair organisar eir in avegnir seis arandschamaints culturals. In quist connex ha il president da la società „Grotta da Cultura“preschantà al capo ün palperi da posiziun chi skizza ils prüms pass dal proget “La Grotta illa Motta”. La possessura dal stabilimaint “La Motta” Margrit Keller e seis partenari Ruedi Welten sun intenziunats da metter a disposiziun las localitats necessarias per la “Grotta da cultura”. Il Cussagl cumünal piglia a cogniziun il palperi da posiziun e spetta cun interess co cha'l proget, ch'id es per intant amo fragmentari, as sviluppa.

Posta

Il capo orientescha chi saja entrada la resposta a regard l'offerta da cumprita pel stabilimaint da la Posta cha'l cumün vaiva inoltrà. Tenor la resposta nun ha la Post Immobilien l'intenziun d'entrar sülla proposta fatta uschè cha'l predscha da vendita resta pels respunsabels da la Post Immobilien sün fr. 1'000'000.--.

In quist connex orientescha il capo eir ch'el haja gnü üna sezzüda cun Daniel Koller da la TESSVM e cun Andri Guler dal Sent Turissem per discussiunar sur da las differentas localitats alternativas chi füssan eventualmaing avantman sper las localitats i'l stabilimaint da la Posta e chi füssan forsa amplamaing adattadas per manar il büro da turissem insembel cun l'agenzia da Posta.

L'actuara: